

Ils 22 d'uost: Sogns Timoteus, Hipolit e Sinforian, marters



Sco oz vegn fatg els survetschs divins memoria da treis sogns marters. Igl emprem da quels ei sogn Timoteus ch'ei naschius ad Antiochia e tratgs si en buna pietad e bein instruius enten la vera teologia. El ei lu daventaus in devozius e perdert augsegner che ha cun siu bien exempel e ses priedis convertiu nundumbreivels pagauns tier la vera cardientscha. Suenten haver luvrau zacons onns en sia patria per la gloria da Diu e per il salit dallas olmas, va el a Ruma gest da quei temps che papa Melchiades guvernava la sontga Baselia. Leu ha el visitau las fossas dils sogns apostels ed auters sogns cun particulara devoziun. Lura entscheiva el cun sia innocenta veta e sontga ductrina a confortar ils carstgauns travigliai e persequitai, sinaquei ch'els stettien statteivels alla cardientscha da Cristus. Era ha el menau biars pagauns tier la glisch dil sogn evangeli.

Cun far semeglionta missiun apostolica durant 15 meins pigl entir Ruma entuorn, eis el vegnius arrestaus e turzegiaus dil prefect Tarquinius. E nunvulend el calar da confessar Jesus Cristus per ver Diu, eis el treis ga vegnius bastenaus crudeivlamein e fiers en ina stgira perschun, nua ch'el ha cun pazienza pitu dil mal, dalla fom e seit. Lu vegn el menaus viado avon las statuas dils dieus fauls per far adurar quellas. Mo il sogn spiritual sbetta quellas figuras diabolicas e vul saver da quellas nuotzun. Perquei vegn el danovamein pitgaus, gheslegiaus e tgerlaus senza compassiun e silsunter ils 22 d'uost digl onn 312 scavazzaus. La virtuosa dama Teodora ha lu satrau il sogn tgierp sper la fossa da sogn Paul apiestel.

Il secund da quels treis sogns marters ei sogn Hippolit, in uestg dall'Arabia, in um da gronda sabientscha e ductrina che ha scret biars nizeivels cudischs pil beinesser dalla sontga cardientscha e che ha convertiu pli che 30'000 pagauns tier Cristus, sco Baronius dat perdetga. Suenten ch'el ha giu reglau la baselia episcopala e provediu quella cun buns pasturs, eis el ius a Ruma per visitar las fossas dils glorius apostels sogn Pieder e sogn Paul e per reverir las reliquias dils auters sogns marters e lu per plidar cun papa Calixtus I sur dils pugns da cardientscha.

Vesend il papa tgei gronda savida Hippolit veva, ha el buca schau turnar el pli egl Orient e tschentau el per uestg dil Porto Romano, in marcau datier da Ruma e quei era per sesurvire da ses sabis cussegls. Cheu ha il sogn uestg, sco egl Orient purtau avon al pievel il sogn evangeli aschi bein che mellis pagauns embratschavan la cardientscha da Jesus Cristus e seschavan battegiar. Ulpianus, president e grond minister digl imperatur Alexander Severus e criu inimitg dils cristians ha cun tradiments fatg pigliar Hippolit, ligiar ad el peis e mauns e neghentar en in profund puoz, ils 22 d'uost digl onn 229. Siu tgierp han ils fideivels da notg priu ord l'aua e satrau leu damaneivel en tutta honur.

Sco tierz marter vegn oz era fatg memoria da sogn Sinforian, naschius entuorn igl onn 165 ad Autun en Frontscha. Il bab Faustus fuva in reh e niebel signur da gronda pietad. El deva quartier a da tutta glieud jastra. Era sch'il marcau d'Autun fuva pagaun, ha Sinforian saviu

mantener sia innocenza senza sefar culpeivels dallas sfarfatgadads dils pagauns. Per la conversiun da quels ha il sogn savens pli cun larmas che cun plaids urau tier Jesus. Ils pagauns vevan l'isonza da savens far grondas festivitats per honorar in u l'auter da lur dieus. Tier talas caschuns vegneva commess publicamein scandalusas acziuns, ovras e giugs. Tals dis steva Sinforian a ca-sia e plunscheva pervia dalla tschoccadad da quei miserabel pievel pagaun. Tier ina da quellas fiastas fuvan biars pagauns serimnai avon la figura da Cibelle che vegneva tenuta per la mumma da tuts dieus. En pompusa processiun purtavan ils pagauns quella fugura entuorn ed alla fin da quella solemnidad entscheveva il pievel a commetter lur macorts giugs en veneraziun da quella diala Cibelle.

Sinforian ch'ei per schabetg staus cunfrontaus cun quella processiun ha giu tal displascher ch'el ha buca pudiu quescher e detg tut da vilau: Eis ei pusseivel che persunas d'intelligenza san esser schi tups ed orda senn? Il pievel che ha udiu ses plaids ha tenu el per inimitg e sbittader da lur dieus. Cun aviras e sco in rebell han ei menau el avon Heraclius, il guvernatur dil marcau. Quel damonda suenter siu num ed il liug. Sinforian rispunda senza tema: Jeu sun in cristian e miu num ei Sinforian. Il derschader sesmarvegla ch'in schi giuven ord nobla casa sappi esser in cristian e damonda, pertgei ch'el sappi buca honorar la mumma da lur dieus. Sinforian rispunda: Jeu hai gia detg, numnadamein perquei che jeu sun in cristian ed adurel il sulet ver Diu che regia tschiel e tiara. La Cibelle denton - sche vus deis a mi la lubientscha - vi jeu cun in marti pitgar tut en tocs. Heraclius ha saviu prender ord quels plaids che Sinforian seigi in blastemader dils dieus ed in sbittader dils decrets digl imperatur. Aunc lu ha el cun buns plaids rugau ed empruau da surplidar il sogn confessur da Cristus da far adurar ils dieus jasters. Sinforian ei staus statteivels e dau d'entellir che ni smanatschas ni empermischuns possien volver el. Sin quei eis el vegnius gheslegiaus e fiers en ina stgira perschun.

Suenter entgins dis vegn il sogn marter puspei presentaus avon il derschader; mo el resta sco avon taffers e fermes per defender la honur dil sulet ver Diu e renviar las superstiziuns dils pagauns. Perquei vegn el condemnaus alla mort entras la spada. Sin quella sentenza selegrava Sinforian ed engraziava a Diu per quella speciala favur e rugava il tschiel da conceder la glisch dalla vera cardientscha a ses cumpatriots pagauns. Cura ch'el ei vegnius menaus tier l'execuziun ha sia mumma confortau siu fegl da buca temer da brattar la veta temporal a cun la beada veta perpetua. Sinforian, udend sia mumma ha pigliau curascha e purschiu al hentger siu tgau ils 22 d'uost digl onn 273. Ils cristians han discusamein satrau il tgierp leu damaneivel d'ina fontauna, tras la quala sin intercessiun da sogn Sinforian biars cristians e pagauns survegnevan biaras grazias.

Reflexiun

La Baselia ei oz buca persequitada sco dil temps dils imperaturs pagauns. Tras il saung dils sogns marters ha la cardientscha catolica victorisau. Ils tirans ein vegni surventschi e tuttina ston ils cristians temer persecuziuns, denton buca da quellas che mazzan il tgierp, mobein l'olma e fan piarder il sogn parvis. Cun ina tirania bia pli crudeivla enviers l'olma vegn ina gronda part dils cartents persequitai senza ch'els s'encorschien ch'els vegnan menai giud la via dil pavis. Ch'ei seigi la verdad ni buc, il sogn evangeli muossa ch'ins sa buca daventar salv per quella via, mobein mo sin l'autra che tons han tema dad ir. Ribad. Weisb.